

ANEKS

Kriteriji za dodjelu stipendija redovnim studentima prvog i drugog ciklusa studija s prebivalištem na području Zeničko-dobojskog kantona za akademsku 2024/2025. godinu

Član 1. (Korisnici stipendije)

Korisnici stipendije su redovni studenti prvog i drugog ciklusa studija s prebivalištem na području Zeničko-dobojskog kantona, do 26 godina starosti koji nisu u radnom odnosu ili koji su zaključili ugovor o obavljanju privremenih i povremenih poslova u skladu sa članom 166.a Zakona o radu (Službene novine Federacije BiH, broj: 26/16, 89/18, 44/22 i 39/24) i koji ispunjavaju uvjete utvrđene ovim kriterijima i konkursom.

Član 2. (Pravo učešća na konkursu)

(1) Pravo učešća na konkursu imaju kandidati koji ispunjavaju sljedeće uvjete:

- a) da su državljani Bosne i Hercegovine;
- b) da imaju prebivalište na području Zeničko-dobojskog kantona;
- c) da su redovni studenti prvog ili drugog ciklusa studija na visokoškolskim ustanovama u Bosni i Hercegovini ili izvan Bosne i Hercegovine, bez obzira na način finansiranja studija (redovni koje finansira osnivač visokoškolske ustanove i redovni samofinansirajući);
- d) da su upisali ljetni semestar akademske 2024/2025. godine,
- e) da nisu stariji od 26 godina
- f) da nisu u radnom odnosu ili da imaju zaključen ugovor o obavljanju privremenih i povremenih poslova u skladu sa članom 166.a Zakona o radu (Službene novine Federacije BiH, broj: 26/16, 89/18, 44/22 i 39/24).

(2) Pravo učešća na konkursu nemaju:

- a) studenti koji koriste usluge smještaja i ishrane u studentskim domovima;
- b) studenti koji primaju stipendiju od drugog stipenditora;
- c) studenti za koje je utvrđeno da su, protivno datoj izjavi u prethodnoj akademskoj godini, primili stipendiju od drugog stipenditora;
- d) studenti koji obnavljaju godinu studija,
- e) studenti koji su već jednom dobili stipendiju za određenu godinu studija na istom ili drugom fakultetu
- f) studenti u statusu apsoluta;
- g) studenti koji su u akademskoj 2023/2024. godini ostvarili pravo na stipendiju kao studenti prve godine studija, a u akademskoj 2024/2025. godini ponovo upisali prvu godinu studija na nekom drugom fakultetu;
- h) studenti koji imaju ugovor o radu zaključen na neodređeno vrijeme.

Član 3. (Lista kandidata)

(1) Lista kandidata za dodjelu stipendija sačinjava se na osnovu ukupno ostvarenog broja bodova koji se dodjeljuju po osnovu uspjeha, godine studija, materijalne situacije, socijalnog statusa (studenti sa invaliditetom, studenti bez oba roditelja, studenti štićenici ustanove bez roditeljskog staranja i

studenti čiji su roditelji/staratelji korisnici novčane socijalne pomoći) i na osnovu deficitarnih zanimanja.

(2) Pripadnici romske nacionalnosti imaju pravo na bezuvjetnu dodjelu stipendije.

Član 4. (Bodovanje)

(1) Bodovanje kandidata vrši se na osnovu USPJEHA -prva godina studija

Bodovanje studenata prve godine prvog ciklusa studija vrši se tako što se:

- a) prosječna ocjena uspjeha uveća za 4 i množi koeficijentom 5 (uspjeh *odličan*),
- b) prosječna ocjena uspjeha uveća za 3 i množi koeficijentom 5 (uspjeh *vrlo dobar*),
- c) prosječna ocjena uspjeha uveća za 2 i množi koeficijentom 5 (uspjeh *dobar*),
- d) prosječna ocjena uspjeha uveća za 1 i množi koeficijentom 5 (uspjeh *dovoljan*),
- e) studentima prve godine koji su bili učenici generacije u srednjoj školi dodaje se još 25

bodova.

(2) Bodovanje kandidata vrši se na osnovu USPJEHA - druge i viših godina studija

Bodovanje studenata druge i viših godina prvog ciklusa studija i drugog ciklusa studija vrši se tako što se:

- a) prosječna ocjena svih položenih ispita tokom cjelokupnog prethodnog studija (uključujući i ispite položene u akademskoj 2024/2025. godini) množi koeficijentom 5,
- b) studentima koji su ostvarili prosječnu ocjenu najmanje 9,00 ili ekvivalent, pored množenja koeficijentom 5, dodaje još 5 bodova.
- c) Prosječna ocjena svih položenih ispita tokom cjelokupnog prethodnog studija u drugom ciklusu studija uključuje i ocjene iz prvog ciklusa studija.

(3) Bodovanje kandidata vrši se na osnovu GODINE STUDIJA:

- a) studenti druge godine - 4 boda
- b) studenti treće godine - 6 bodova
- c) studenti četvrte godine - 8 bodova
- d) studenti pete godine - 10 bodova
- e) studenti šeste godine - 12 bodova

(4) Bodovanje kandidata vrši se na osnovu CIKLUSA STUDIJA

U skladu sa članom 5. stav (1) Okvirnog zakona o visokom obrazovanju u Bosni i Hercegovini, prvi ciklus studija traje najmanje tri i najviše četiri godine. Jedna godina studija vrednuje se sa 60 ECTS bodova (European Credit Transfer System). Iz odredbi člana 5. stav (1) izuzima se studij medicinske grupe nauka, koji se u prvom ciklusu studija vrednuje do 360 ECTS bodova, odnosno, koji može trajati do 6 godina. Drugi ciklus studija traje jednu ili dvije godine (zavisno od trajanja prvog ciklusa studija) i vrednuje se tako da u zbiru s prvim ciklusom studija nosi 300 ECTS bodova. Koncept trajanja prvog i drugog ciklusa studija može biti: 3+2 ili 4+1. Studentima prve godine drugog ciklusa studija po konceptu 3+2 dodaje se 8 bodova (što odgovara četvrtoj godini studija). Studentima druge godine drugog ciklusa studija po konceptu 3+2 dodaje se 10 bodova (što odgovara petoj godini studija). Studentima drugog ciklusa studija po konceptu 4+1 dodaje se 10 bodova (što odgovara petoj godini studija).

(5) Bodovanje kandidata vrši se na osnovu MATERIJALNOG STATUSA

Bodovanje se vrši na osnovu ukupnih mjesečnih primanja porodice po članu domaćinstva, a prema kućnoj listi i priloženom dokazu o statusu za svakog člana domaćinstva:

- a) do 60 KM - 25 bodova;
- b) 61 KM - 100 KM - 20 bodova;

- c) 101 KM - 150 KM - 15 bodova;
- d) 151 KM - 200 KM - 10 bodova;
- e) 201 KM - 250 KM - 5 bodova;
- f) 251 KM - 300 KM - 1 bod;
- g) preko 300 KM - 0 bodova.

(6) Bodovanje kandidata vrši se na osnovu SOCIJALNOG STATUSA

- a) invaliditet studenta (po bilo kom osnovu)
 - 1. do 40% - 5 boda;
 - 2. 40 - 70% - 8 bodova;
 - 3. preko 70% - 10 bodova.
- b) studenti bez oba roditelja - 10 bodova.
- c) studenti štíćenici ustanove bez roditeljskog staranja - 10 bodova.
- d) studenti čiji su roditelji/staratelji korisnici novčane socijalne pomoći - 10 bodova.

(7) Bodovanje kandidata - STUDENATA KOJI SE OBRAZUJU ZA DEFICITARNA

ZANIMANJA vrši se na način da im se dodjeljuje 8 bodova za sljedeća deficitarna zanimanja i to: Doktor opće medicine, Edukator-rehabilitator, IT inženjer, Inženjer informatike, Inženjer softverskog inženjerstva, Inženjer elektronike, Inženjer računarske elektronike, Inženjer medicinske elektronike, Inženjer elektroenergetike, Inženjer građevine, Bachelor fizike, Magistar fizike, Profesor fizike, Profesor matematike, Profesor predškolskog odgoja i obrazovanja.

(8) Nazivi zanimanja iz stava (7) ovog člana korišteni su sa evidencije JU Služba za zapošljavanje Zeničko-dobojskog kantona.

(9) Pripadnici romske nacionalnosti i djeca bez oba roditelja o kojima se brine država imaju pravo na bezuvjetnu dodjelu stipendije.

Član 5.
(Novčana nagrada)

(1) Studentima koji studiraju za deficitarna zanimanja iz člana 4. stav (7) ovih kriterija, a ujedno imaju prosječnu ocjenu najmanje 8,0 ili ekvivalent pored stipendije dodjeljuje se novčana nagrada u visini koju utvrđuje Vlada Zeničko-dobojskog kantona.

(2) Odredba stava (1) ovog člana ne odnosi se na studente I godine I ciklusa studija.

Član 6.
(Lista prioriteta)

U slučaju kada se pojavi veći broj kandidata za dodjelu stipendija, Ministarstvo za obrazovanje, nauku, kulturu i sport Zeničko-dobojskog kantona utvrđuje listu prioriteta prema odredbama člana 4. ovih kriterija.

Član 7.
(Konkursna procedura)

(1) Stipendije se dodjeljuju na osnovu konkursa koji se objavljuje u jednom od dnevnih listova i u listu „Naša riječ“, na općinskim/gradskim oglasnim pločama i na službenoj internetskoj Zeničko-dobojskog kantona.

(2) Prijave na konkurs sa potrebnom dokumentacijom kandidati dostavljaju resorno zaduženim službama za društvene djelatnosti općine/grada u kojoj imaju prebivalište.

(3) Bodovanje i rangiranje kandidata za dodjelu stipendija vrši komisija nadležne općinske/gradske službe.

(4) Rukovodilac nadležne općinske/gradske službe rješenjem formira komisiju koja vrši bodovanje i rangiranje kandidata te objavljuje preliminarnu listu prema broju bodova, ostvarenim na konkursu.

(5) Sve eventualne prigovore (obrazložene i utemeljene na dokazima) na preliminarnu listu, kandidati mogu podnijeti nadležnoj općinskoj/gradskoj službi u roku od 8 dana od objavljivanja na oglasnoj ploči matične općine/grada.

(6) Nakon razmatranja podnesenih prigovora, komisija sačinjava konačnu preliminarnu listu (spisak studenata koji su u konkurenciji za dodjelu stipendija), koju objavljuje na oglasnoj ploči općine/grada i dostavlja Ministarstvu za obrazovanje, nauku, kulturu i sport radi dodatnih provjera.

(7) Nakon dodatnih provjera iz stava (6) ovog člana Ministarstvo za obrazovanje, nauku, kulturu i sport dostavlja konačnu listu općinama/gradovima, a koju općine/gradovi objavljuju na oglasnoj ploči i web stranici i na koju kandidati imaju mogućnost ulaganja žalbe.

(8) Žalba iz stava (7) ovog člana se podnosi putem nadležne općinske/gradske službe Ministarstvu za obrazovanje, nauku, kulturu i sport u roku od 8 dana od objavljivanja konačne liste na oglasnoj ploči/web stranici općine/grada.

(8) Ministarstvo za obrazovanje, nauku, kulturu i sport zadržava pravo da u toku konkursne procedure, a na osnovu slučajnog uzorka, izvrši uvid u bodovanje koje vrše općinske/gradske komisije.

Član 8. **(Način isplate sredstava)**

(1) Isplatu sredstava vršit će nadležne općinske/gradske službe putem tekućeg računa studenta, a prema Konačnoj listi koju utvrđuje i dostavlja Ministarstvo za obrazovanje, nauku, kulturu i sport.

(2) Nadležna općinska služba dužna je dostaviti Ministarstvu izvještaj po isplati doznačenih sredstava.

Član 9. **(Objavljivanje Kriterija)**

Kriteriji za dodjelu stipendija redovnim studentima prvog i drugog ciklusa studija s prebivalištem na području Zeničko-dobojskog kantona za akademsku 2024/2025. godinu objavit će se na općinskim/gradskim oglasnim pločama i na internetskoj stranici Zeničko-dobojskog kantona.